

佛說八大人覺經講義 (十二)

寬如合撰

故宗鏡云：「說圓頓教，印象生心，開大施之門，成無邊之益，若不以此示人，雖有利他，不名盡善，益既少而用力尤多，若直指自心，全提家寶如傾囊倒藏大施無遮，究竟常樂」，所以輔行記云：「若以權法化人，法門雖開，不名傾藏，亦不名普濟一切，即同小乘，耽於空寂，此事爲不可也。」故當以大乘法，普濟一切衆生，堪稱發廣大圓頓之心。

『願代衆生受無量苦』者，立此誓願，甘心替代一切衆生受無量苦，衆生無量，業苦無量，積集苦果，更復無量，而甘代受，此乃發大乘心者之增上大悲，如華嚴經普賢行願品云：「從初禮拜，乃至隨順所有功德，皆悉回向，盡法界，虛空界，一切衆生，願令衆生，常得安樂，無諸病苦，欲行惡法，皆悉不成，所修善業，皆速成就。關閉一切諸惡趣門，開示人天涅槃正路。若諸衆生，因其積集諸惡業故，所感一切極重苦果，我皆代受，令彼衆生，悉得解脫，究竟成就無上菩提。」代衆生受苦，有種種方便不同，一、將所有功德普爲衆生回向，使罪業潛消，福慧增長也。二、衆生所有苦難，菩薩悉皆代之。三、以財拔衆生苦。四、以法化導，使拔苦因，而得樂果，所謂關閉一切諸惡趣門，開示人天涅槃正路也。五、辦如法道場，令安心止觀，或修諸法門，總令不墮三塗，或辦法會，令衆生聞法得益。六、道場諸職事，捨己從人，爲公忘私。七、爲世良醫，善療衆病，令脫痛苦。八、爲校良師，誘諸童蒙，當成大器。九、爲民父母，撫育蒼生。十、爲家之主，同得歡樂。如是等輩，肯發大乘心，盡責服勞，捨己爲人，皆可名代衆生受苦也，所謂受諸萬行，不爲自身而求人天福報，及求聲聞緣覺，普令衆生同成正覺，是名依最上乘法，發阿耨多羅三藐三菩提心，菩薩之所以代衆生受苦者；是大悲願力，眞行實踐，盡責化度，巧設方便，種種言教，務令衆生究竟脫離苦因，究竟得常樂極果，非如捨身毀形修無益苦行，

巧言代受之可同日語也。以衆生不了業體從妄而生，妄執實有，無由出苦，而大士悲心，宏法佈教，令修此八大人覺法，使無暫捨，自不作惡因，苦果何由得生，如是無量苦惱既除，即同代受無量諸苦也，有如地藏大士，地獄未空，誓不成佛，亦爲衆生離苦故也。

『令諸衆生，畢竟大樂』者，上句明拔苦，此句明與樂，誓與以菩提大覺，涅槃大樂，如起信論云：「爲令衆生，離一切苦，得究竟樂，非求世間名利恭敬故」一切苦通於二死三惑煩惱，『畢竟大樂。』是大涅槃常樂我淨，今非求世之名利，恭敬，凡有所求，普欲令衆生同證無上菩提而已。

例如第一覺結文『如是觀察，漸離生死。』謂若能如是觀察，則覺知生死熾然，苦惱無量。是故居士們在塵不染塵，志願出家，自欲解脫生死，離諸苦惱，令親緣眷屬，及一切衆生，皆不戀塵勞，解脫惑死，此明觀有不住有，是了因慧心發，悟圓眞諦理，了了一切法皆空故。

『發大乘心普濟一切』，則稱性發菩提心，以大乘佛法，普遍流入社會人心，使衆生自知皆當作佛，體佛心爲心，以佛行爲行，彼此慈悲相向，互助互濟，更何有鬥爭諸般苦惱，是即娑婆即極樂矣，此明觀空不住空，是緣因善心發，悟圓俗諦理，了一切法皆妙有也。

『願代衆生受無量苦，令諸衆生畢竟大樂』，知眞俗唯心，悟諸法實相，湛然不住，方能代衆生受無量苦，了徹心佛衆生，三無差別，平等與拔，方能令衆生領會斯旨，共趣菩提，永離生死，畢竟同證大般涅槃，畢竟常樂，此明觀中不滯中，是正因理心發，悟圓中諦理，了一切法皆唯心中道，了然無住，圓成種智故。此覺是明行者由觀行入相似，分證，乃至究竟位也。可知八種覺法，一一皆示如是觀察，漸離生死，乃至永離生死，畢竟永

享大樂，是則此經誠欲聞者三因頓發，三觀齊修，三諦圓顯，三德圓消，三德圓彰之成佛法門也明矣。

乙二，結成。

如此八事，乃是諸佛菩薩之所覺悟，精進行道，慈悲修慧。乘法身船，至涅槃岸，復還生死，度脫衆生，以前八事，開導一切令諸衆生，覺生死苦，捨離五欲，修心聖道。

「如此八事乃是諸佛菩薩大人之所覺悟」者，今先結成此經名義，「如此」者，指法之辭，指前八種覺法，非小人庸常之事，乃是三世十方諸佛菩薩過量大人之所覺徹事理，悟明心性之事，八事爲所觀之理境，覺悟之心爲能觀之智慧，今能觀之智明，所觀之理徹，則智如理亦如，一如無二如，佛是先覺，菩薩是後覺，佛說此八事，是以先覺覺後覺，佛是究竟覺，菩薩是始覺，菩薩承訓依此而起始覺妙智，行此八事，還照本覺妙理，始本一合，智理一如，成究竟覺，故依此而立經名。曰「佛說八大人覺經」也。

「精進行道慈悲修慧，乘法身船，至涅槃岸者」者，明目覺修覺。別指前第四覺法，破惑伏魔，出陰界獄，通指則謂依此八法，專精勇進，修行即趣無上覺道，故曰「精進行道」。

「慈悲」二字，則別指第六七覺法，通指全經，運無緣慈。起同體悲，究竟與樂拔苦故。

「修慧」者，由修習禪定所起之智慧，別指第一二三覺法，少欲無爲，知足守道之空智，第五覺廣學多聞之聞慧，通指依此八法，稱性而修，從定所發之妙智。慈悲是福德，修慧是智德。因中悲智雙運，果上福慧二嚴，故悲智爲成佛之因，福慧兩足，是菩薩所期之果，故曰「慈悲修慧」。

「乘法身船，至涅槃岸」者，乘是能乘（讀平聲），法身者，法爾天然之身也，即心性別名，所謂自性清淨法身，大功德法所依止故，述記曰：「離所知障，具無邊德，名爲法身，解釋有二義，一，顯本法性，以成其身，名爲法身，即自性清淨法身，二以一切功德法而成身，故名法身，即妙極清淨法身也，此中因中稱性所起是自性清淨法身，果上所顯是妙極清淨法身也。心地觀經曰

：「善逝恆爲妙法船，能截愛流超彼岸」，故云：「乘法身船，至涅槃岸」，涅槃者梵摩，具云摩訶般涅槃那，此云大滅度，大即法身體大，無法不統故，滅即般若相大，無法不照，無惑不滅故，度即解脫用大，無法不容，度脫生死故，三德圓融，唯是一心，故名大滅度。又翻爲大寂滅，究竟不生不滅故，衆生在生死此岸，欲渡煩惱中流，必以悲智爲能乘，法身爲所乘，能所不二，智理如如，方能出生死此岸，渡煩惱中流，直至菩提涅槃彼岸」。故曰「至涅槃岸」。此依般若無住真宗，精進行道，一乘大道，慈悲修慧，悟無住理，起無住行，證無住果，故乘法身船，不住生死此岸，不住煩惱中流，直至菩提涅槃彼岸。若理若行若證，一一皆無住無著，方能洞達中邊，皆是實相，平等眞如，成無上道，此上四句結成自覺功德，並明三覺圓成，精進行道，是自覺，亦是始覺智，慈悲修慧，是因中覺他，乘法身船，指所悟法，亦是本覺理，至涅槃岸，是修德所顯之究竟覺，亦是滿覺，是故以始覺智，還照於法身本覺理，始本一合，成究竟覺，亦即自覺覺他覺滿，圓成種智也，上明從因證果，「復還生死，度脫衆生」，此下明帶果行因，結成覺他功德也，二乘人則不住眞諦涅槃，復還三界生死，廣學四教四門，度脫衆生，大乘行人既到涅槃，不住涅槃，再復還來，應現於世間，示生示滅，普門示現，分身塵刹，救度解脫一切善惡衆生，如觀音，文殊，之倒駕慈航，釋尊之塵刹利生，亦即申明成佛之本旨，非爲自求涅槃常樂，欲與衆生同成佛道耳。如法華經云「舍利弗當知，我本立誓願，欲令一切衆，如我等無異。如我昔所願，今者已滿足，化一切衆生，皆令入佛道。」

「以前八事開導一切」者，以前八種覺法，所詮教理行證，即以自覺之道而覺他。如法華經云：「佛自住大乘，如其所得法，定慧力莊嚴，以此度衆生」。佛以自已成佛法門，公開教化一切衆生，無非欲令衆生，同己所證，豈特不同世之秘方自私，亦不同二乘自利，慈悲普愛，誰宗教之所能及哉。

「令諸衆生覺生死苦」者，正普令一切衆生，了知生死根本，不隨生死流，回頭是岸。此乃拔苦之源，按前第一、二、五

、八覺法所生死過患。

『捨離五欲』若欲脫生死，當捨離五欲，拔苦清源之妙法也，攝前第二、三、七覺法，第二少欲明無爲得自在，第三明安貧守道，唯慧是業，第七明常念三衣瓦钵法器，志願出家，守道清白等，皆明五欲爲生死根本，急須捨離。

『修心聖道』，明稱性起修，無修而修，修還契性，性修不二，智理圓融。方是大覺聖人所覺之菩提道，此中攝少欲無爲，身心自在，亦攝第三唯慧是業，亦攝第四摧魔破惡，亦攝第五廣學多聞，與第六等施，及第七梵行，並第八普濟之文義，謂以自已因中所覺八種覺法；而覺一切衆生，以斯道覺斯民，此之謂也，佛地經論云：「於一切法，一切種相，能自開覺，亦能開覺一切有情故，故名爲佛」。又如華嚴經曰：「其轉聖道妙法輪也」。斯則名爲眞發菩提心，其功德不可思議，若不了此心，則不能發心修行，返本還源，故永明壽禪師云：「若凡未執着此心，造輪迴業，二乘厭棄此心，求灰斷果，又凡夫無眼，將菩提智照成煩惱火燒，如大富盲兒，坐寶藏中，舉動罣礙，爲寶所傷，二乘將如來四德秘藏，爲無常五陰，謂是賊虎，龍蛇，怕怖馳走，縛脫雖殊，取捨俱失」，若諦了通達修心聖道者，不起不滅，無得無生，了無妄心，念念無體，從何起執，念念自離，不須斷滅，尙不得一心之名，何況二乎。了此方可從性起修，修還契性，自利如是，利他亦爾，如是卽入大乘，乃至究竟證，莫不由斯了悟而已，故古人云：「不卽心爲道者，如千人排門，無一得入，若了心頓入者，猶一人拔關，能通萬彙」，故修心者，可登聖道。

甲三、流通分

若佛弟子，誦此八事，於念念中，滅無量罪，進趣菩提，速登正覺，永斷生死，常住快樂。

此當流通分，以此圓覺妙行，頓成妙覺，以廣布流通，使見聞受持者，同得常樂。

『若佛弟子誦此八事』。此經初明，特爲佛弟子說，經終亦明佛弟子誦，可知此八事，爲佛子不可須臾離之事，無論在家出家，凡佛弟子，皆應誦此八大人覺法，行此八事，能與佛常樂，

暢叙天倫，唯此一舉，何樂而不爲，故結成誦念功德，誦此一字，括讀及受持，書寫，解說，隨喜五品，蓋對本名讀，熟讀能背名誦，能誦必能思維其義，能思其義，必能受持奉行。能行持，必書寫以流通，欲流通，自必解說，並爲人解說，勸人受持，見人受持，必讚歎隨喜，既誦持其文，精思其義，以此八大人覺法，自覺覺他，故得於念念中，滅無量罪，乃至成佛，諸勝功德，不可思議。

『於念念中滅無量罪』者，明頓消罪業，剎那乃時食中之短少，於短少時間中，受變化速者，莫如心念之起，故剎那翻爲念頃，念念者，剎那剎那也，亦卽後念逐前念，今於念念相繼中，不忘誦持此八事，故得消滅無量罪業，罪業是煩惱之果，果必由因，溯本窮源，由於當人一念，念念起惑，則爲罪因，今既念念持八大人覺，則念念不與惑相應，則念念罪因滅，罪因既滅，則惑滅，惑滅何來罪業，罪業既滅，則罪果亦滅，故云：『滅無量罪』，今既念念中滅無量罪，則生死之因滅，何生死之有。『進趣菩提』者，此明修因，念念中既不與惑相應，而與八大人覺相應，則惑消慧朗，悟本妙心，稱性修行，從此精進勇猛，以八大人覺法爲能歷，五十五位菩提路爲所歷，趣向菩提，於中了無迂曲相，更無退屈想，梵語菩提，此爲覺道，覺徹心法妙理之道，故由初發菩提心，起菩提願，歷菩提路，趣菩提果，從始洎終，一志菩提，皆由廣學多聞而進，今依此八大人覺法修，直趣菩提道，故曰「進趣菩提」。

『速登正覺』，此明證果，迅急曰「速」，進曰「登」。平等曰「正」。徹心曰「覺」，謂念念誦持八大人覺，與覺相應，滅無量罪，則福德生，進趣菩提，則智慧長，念念誦持，則念念覺，念念滅罪，則無量福生，念念趣道，則無量慧長，既念念覺，念念具足福慧二嚴，故速登正覺，歷五十五位眞菩提路，盡妙覺果海名正覺，梵語具云阿耨多羅三藐三菩提，此云無上正等正覺，證悟一心之理，更無過上故曰「無上」。徹一乘妙理，了諸法實相曰「正等」。如實覺知，心佛衆生三無差別，名正覺，今經以菩提心爲體故無上，以一乘爲宗，故「正等」。去迷爲用，

欲云正覺，是則念念誦持此經，速登正覺宜矣。

『永斷生死』，此明究竟拔苦，即大悲，生死為衆業之果，衆業為生死之因，上既明於念念中滅無量罪，則苦因滅，則更何有生死苦果耶？今速登正覺，三惑窮盡，二死永亡矣，故曰『永斷生死』。

『常住快樂』者，此明究竟與樂，即大慈。

『常住』者，無生滅去來，『快樂』者，暢懷適意也，徹證本心，常住寂滅，復還法身，適意自在，故曰：『常住快樂，誦此八事，於念念中，滅無量罪』，即解脫德，『進趣菩提，速登正覺』，即般若德，『永斷生死，常住快樂』，即法身德，因中誦此八大人覺，即與如來果上三德相應，是因該果海，諸佛果上圓證三德，無非因中持此八大人覺法所成就，是果徹因源。

『若佛弟子誦此八事』，應上序分『為佛弟子常於晝夜，至心誦念八大人覺！』

『於念念中，滅無量罪』，應上初覺「心是惡源，形為罪藪，如是觀察，漸離生死。」則四倒罪滅，應第二覺知「多欲為苦」。則欲罪滅，是生死因滅，第三覺知「知足安貧」，則多求罪滅，第四覺知「精進」，則怠懈罪滅，煩惱四魔陰界隨滅，第五覺知「多智慧，則痴障滅，第七覺知「梵行清淨」則塵勞欲染罪滅，第八覺知「發大乘心，普濟一切，則耽空著有罪滅，如是觀之，何罪不滅，故能念念滅無量罪也。

『進趣菩提，速登正覺』應上初覺「觀世間無常，乃至漸離生死。」則為進趣菩提之初步，登正覺之初階，第二覺「少欲無為，身心自在，」欲淨身口意，淨戒為菩提本，今登正覺，戒德圓成，方究竟身心自在，第三覺「安貧守道，唯慧是業」，則守菩提道，以般若為進趣行業。第四覺「常行精進，摧伏四魔」，正為進趣菩提道，速登正覺之階，第五覺「廣學多聞，教化一切」，是以智慧莊嚴佛淨土之正因，趣菩提登正覺基礎，第六覺「平等布施」，是以福慧莊嚴佛土，以備作菩提正覺兩足尊，第七「守道清白」，即律儀戒。「梵行高遠」，即善法戒。「慈悲一切」，即利益有情戒。三聚淨戒，為無上菩提本。第八覺「大心普濟」

，代衆生受苦，與衆生樂，正是為衆生故，而取菩提登正覺也。

『永斷生死，常住快樂』者，亦應上八覺之義，初覺「漸離生死」。亦即漸趨常樂，第二覺「厭生死疲勞」，欲身心自在，第三覺「常念知足」，以厭多求離生死因。「唯慧是業」，期常樂果，第四覺「摧伏四魔，出陰界獄」，即斷生死因，證常樂果，第五覺「多聞智慧」，以去愚痴生死，教化一切，悉以大樂。第六覺「等施解怨」，以除生死果慮，而種常樂因，第七覺「出塵厭欲」，以除生死本，「出家持戒」，以成常樂基，第八覺，「大心普濟」，自他共斷生死苦，而得涅槃，常住快樂，前後響應如斯，可知此經功德，實難思議，謹書兩偈敬頌。

初頌八大人覺

比丘尼寬如

三界無安如火宅，「頌第一覺」
無邊生死欲中來，「頌第二覺」
安貧守道禪心朗，「頌第三覺」
精進降魔法界開，「頌第四覺」
廣學多聞資教化，「頌第五覺」
等施息怨斷疑猜，「頌第六覺」
梵行高遠超塵俗，「頌第七覺」
普濟為懷育聖胎，「頌第八覺」

二覺結數

念念毋忘持八戒，愚痴生死剎那乾。法身船到涅槃岸，圓滿菩提拭目看。

佛說八大人覺經終

八大人覺經，文簡義幽，字字藥石，句句療心，能行之者，為過量大人，成佛可期。惟惜撰者智淺未達，每引聖言，欲令初心，生深倍解，依教奉行，不負己靈，聊報佛恩於萬一耳！願明者正之為感。